



ზოგადსაგანმანათლებლო
დანესახულებების ავტორიზაციის საბჭო

23/04/2025



MES 0 25 0000435277

გადაწყვეტილება

**ზოგადსაგანმანათლებლო დაწესებულებების ავტორიზაციის საბჭოს 2023 წლის 18 ოქტომბრის
N1396138 ოქმის მე-7 ნაწილში ცვლილების შეტანის შესახებ**

ზოგადსაგანმანათლებლო დაწესებულებების ავტორიზაციის საბჭოს სხდომაზე გამოვლენილი გარემოებების შესწავლის, შეფასებისა და ურთიერთშეჯერების შედეგად, საქართველოს ზოგადი ადმინისტრაციული კოდექსის 63-ე მუხლის პირველი პუნქტის საფუძველზე,

საბჭომ გადაწყვიტა:

1.შევიდეს ცვლილება ზოგადსაგანმანათლებლო დაწესებულებების ავტორიზაციის საბჭოს 2023 წლის 18 ოქტომბრის N1396138 ოქმის მე-7 ნაწილში და ჩამოყალიბდეს შემდეგნაირად:

„7. სსიპ - ზუგდიდის მუნიციპალიტეტის სოფელ ოქტომბრის საჯარო სკოლის ავტორიზაციის საკითხის განხილვა

საბჭოს თავმჯდომარემ საკითხის განხილვა დაიწყო დაწესებულებების წარმომადგენლებთან და საბჭოს წევრებთან მიმართებით, ხომ არ ჰქონდათ ერთმანეთის მიმართ აცილება. დაწესებულების წარმომადგენლებმა დაადასტურეს, რომ საბჭოს წევრების მიმართ აცილება არ ჰქონდათ, ასევე საბჭოს წევრებმაც დააფიქსირეს იგივე. საბჭოს თავმჯდომარემ მიმართა კვლავ

საბჭოს წევრებს, დაედასტურებინათ, რომ იცნობდნენ ავტორიზაციის ექსპერტთა ჯგუფის დასკვნას და დაწესებულების მიერ წარმოდგენილ არგუმენტირებულ პოზიციას დასკვნის პროექტთან მიმართებით. საბჭოს წევრებმა დაადასტურეს, რომ იცნობდნენ საქმის მასალებს. საბჭოს თავმჯდომარემ ჰკითხა დაინტერესებული მხარის წარმომადგენელს იცნობდა თუ არა ავტორიზაციის ექსპერტთა ჯგუფის დასკვნას. წარმომადგენელმა დაადასტურა, რომ იცნობდა დასკვნას. შესაბამისად, საბჭოს თავმჯდომარემ საბჭოს მდივანს სთხოვა, რომ ექსპერტთა ჯგუფის დასკვნა დაერთო ოქმისთვის, როგორც მისი განუყოფელი ნაწილი.

შემდეგ ზოგადსაგანმანათლებლო დაწესებულებების ავტორიზაციის საბჭოს თავმჯდომარემ სიტყვა გადასცა ექსპერტთა, ჯგუფის თავმჯდომარეს, ირმა ხუციშვილს.

ავტორიზაციის ექსპერტთა ჯგუფის თავმჯდომარემ საკითხის წარდგენა დაიწყო ვიზიტის საერთო მოკლე მიმოხილვით და განაცხადა, რომ სსიპ - ზუგდიდის მუნიციპალიტეტის სოფელ ოქტომბრის საჯარო სკოლაში ავტორიზაციის ვიზიტი განხორციელდა 2023 წლის 02 და 03 აგვისტოს, დამსწრე საზოგადოებას გააცნო ავტორიზაციის ექსპერტთა ჯგუფში შემავალი სხვა ექსპერტები და აღნიშნა, რომ მთლიანობაში ვიზიტმა ჩაიარა მშვიდ და კონსტრუქციულ გარემოში.

აქვე განმარტა, რომ დაწესებულებას სურდა განეხორციელებინა ზოგადი განათლების სამივე საფეხური (დაწყებითი, საბაზო, საშუალო), პროგრამების განხორციელების ენა ქართული, ხოლო ზოგადსაგანმანათლებლო დაწესებულებების სტატუსის მაძიებლის თვითშეფასებაში მოთხოვნილი მოსწავლეთა ადგილების ზღვრული რაოდენობა იყო - 390, რასაც ეთანხმებოდა ექსპერტთა ჯგუფი. ექსპერტმა აქვე აღნიშნა, რომ სკოლა ფუნქციონირებდა ორ მისამართზე, კერძოდ სოფელი ოქტომბერი, კინწურაშვილის N2-ში სასწავლო პროცესი სამივე საფეხურზე იყო უზრუნველყოფილი, ხოლო მეორე მისამართზე, ზუგდიდი, დავითიანის უბანი, დადიანის N18-ში - მხოლოდ დაწყებითი საფეხურის ზოგადსაგანმანათლებლო პროგრამას ახორციელებდა.

აღნიშნულის შემდეგ, ირმა ხუციშვილმა, ისაუბრა იმ რეკომენდაციებსა და რჩევებზე, რაც გაიცა ექსპერტთა ჯგუფის მიერ საბოლოო დასკვნის მიხედვით. ექსპერტთა ჯგუფის თავმჯდომარემ აღნიშნა, რომ დაწესებულებამ არგუმენტირებულ პოზიციასთან ერთად წარმოადგინა სტანდარტებთან უზრუნველყოფის შესაბამისობის გეგმა და ის დოკუმენტები თუ შიდა რეგულაციები, რაც დახარვეზდა პირველადი შეფასებისას. ექსპერტთა ჯგუფმა გაიზიარა სკოლის მიერ წარმოდგენილი არგუმენტირებული პოზიცია და მისი დანართები და შესაბამისად ის ხარვეზები, რაც დაფიქსირებული იყო დასკვნის პროექტში, უკვე საბოლოო დასკვნაში შეფასდა, როგორც შესაბამისი ავტორიზაციის სტანდარტების მოთხოვნებთან.

ექსპერტთა ჯგუფის თავმჯდომარემ შემდეგ წარუდგინა დამსწრე საზოგადოებას ავტორიზაციის სტანდარტების ექსპერტული შეფასება საბოლოო დასკვნის მიხედვით, კერძოდ 1-ლი სტანდარტი - სკოლის ფილოსოფია შეფასდა, როგორც შესაბამისი, მე-2 სტანდარტი - სასკოლო კურიკულუმი - შესაბამისი, მე-3 სტანდარტი - სასწავლო პროცესის ადმინისტრაციული და ინფრასტრუქტურული მხარდაჭერა - შესაბამისი, მე-4 სტანდარტიც - მოსწავლეთა მხარდაჭერა შეფასდა, როგორც შესაბამისი ავტორიზაციის სტანდარტების მოთხოვნებთან.

პრეზენტაციის ბოლოს ექსპერტთა ჯგუფის თავმჯდომარემ, ვიზუალური აღქმისათვის, საბჭოს წევრებსა და დამსწრე საზოგადოებას წარუდგინა სკოლის ინფრასტრუქტურისა და მატერიალური რესურსის ამსახველი ფოტოები.

საკითხის წარდგენის შემდეგ საბჭოს თავმჯდომარემ სიტყვა გადასცა საბჭოს წევრს, ეკატერინე კვირიკაშვილს, რომელმაც კითხვით მიმართა სკოლის წარმომადგენელს თუ რა იყო მიზეზი იმისა, რომ მათ შესაბამისობის უზრუნველყოფის გეგმაში მოუწიათ 3.4.1.1 ინდიკატორის დასაკმაყოფილებელი აქტივობების გაწერა, კერძოდ, რატომ ვერ შეძლეს მათ სახანძრო უსაფრთხოების მიწერილობისა და/ან დასკვნის, საგანგებო სიტუაციების მართვის გეგმისა (შესაბამის უწყებასთან შეთანხმებული) და შენობა-ნაგებობის ექსპლუატაციის შესახებ დასკვნის მოპოვება.

აღნიშნულ კითხვაზე სკოლის დირექტორმა განმარტა, რომ როგორც კი მივიდა მათთან ინფორმაცია, რომ სკოლას სტანდარტებთან შესაბამისობაში მოსასვლელად ესაჭიროებოდათ ზემოთ ჩამოთვლილი დოკუმენტები, მათ დაუყოვნებლივ გააგზავნეს ოფიციალური მიმართვები შესაბამის უწყებებში და ა ელოდებოდნენ რეაგირებებს. აქედან გამომდინარე, სკოლამ ეს აქტივობები გაწერა შესაბამისობის უზრუნველყოფის გეგმაში.

საბჭოს სხვა წევრებს დამატებითი კითხვები აღარ ჰქონდათ.

საბჭოს თავმჯდომარემ, კენჭისყრაზე დააყენა სსიპ - ზუგდიდის მუნიციპალიტეტის სოფელ ოქტომბრის საჯარო სკოლის ავტორიზაციისა და მოსწავლეთა ადგილების ზღვრული რაოდენობის 390-ით განსაზღვრის საკითხი.

კენჭისყრის შედეგები:

მომხრე - 11

წინააღმდეგი - 1

საბჭოს წევრმა ეკატერინე კვირიკაშვილმა კენჭისყრაზე დააფიქსირა უარყოფითი ხმა, რაც დაასაბუთა იმ გარემოებით, რომ სკოლას არ ჰქონდა შენობა-ნაგებობების სახანძრო უსაფრთხოების მოთხოვნებთან შესაბამისობის შესახებ დასკვნა, შენობის საგანგებო სიტუაციების მართვის გეგმა შეთანხმებული შესაბამის უწყებასთან და ასევე, დასკვნა შენობის მდგრადობაზე.

გადაწყვეტილება:

„განათლების ხარისხის განვითარების შესახებ“ საქართველოს კანონის მე-11 მუხლის მე-2 პუნქტის „ა“ ქვეპუნქტის, მე-12 მუხლის, საქართველოს განათლებისა და მეცნიერების მინისტრის 2010 წლის 1 ოქტომბრის N99/ნ ბრძანებით დამტკიცებული „საგანმანათლებლო დაწესებულებების ავტორიზაციის დებულების“ მე-20 მუხლის პირველი პუნქტის „ა“ ქვეპუნქტის, მე-2 და მე-4 პუნქტების და 21-ე მუხლის პირველი, მე-2 და მე-3 პუნქტების შესაბამისად სსიპ - ზუგდიდის მუნიციპალიტეტის სოფელ ოქტომბრის საჯარო სკოლას (ს/კ: 220373566) 9 წლის ვადით მიენიჭოს ზოგადსაგანმანათლებლო დაწესებულების სტატუსი და მოსწავლეთა ადგილების ზღვრული რაოდენობა განესაზღვროს 390-ით.

დაწესებულებას მიენიჭოს უფლებამოსილება განახორციელოს შემდეგი ზოგადსაგანმანათლებლო პროგრამები:

N	ზოგადსაგანმანათლებლო პროგრამის სახელწოდება	ზოგადსაგანმანათლებლო პროგრამის საფეხური	ზოგადსაგანმანათლებლო პროგრამის განხორციელების ენა	ზოგადსაგანმანათლებლო პროგრამის განხორციელების ადგილი (მუნიციპალიტეტის, ქალაქის, დაბის/სოფლის და ქუჩის მითითებით)
1	ზოგადი განათლების დაწყებითი საფეხურის ზოგადსაგანმანათლებლო პროგრამა	დაწყებითი	ქართული	ზუგდიდი, სოფელი ოქტომბერი, კინწურაშვილის N2 / ზუგდიდის მუნიციპალიტეტი, სოფელი დავითიანი, დავით დადიანის I ჩიხი, N1
2	ზოგადი განათლების საბაზო საფეხურის ზოგადსაგანმანათლებლო პროგრამა	საბაზო	ქართული	ზუგდიდი, სოფელი ოქტომბერი, კინწურაშვილის N2
3	ზოგადი განათლების საშუალო საფეხურის	საშუალო	ქართული	ზუგდიდი, სოფელი

ზოგადსაგანმანათლებლო პროგრამა		ოქტომბერი, კინწურაშვილის N2
----------------------------------	--	--------------------------------

საბჭომ შუამდგომლობით მიმართა დაწესებულებას, რომ მოახდინოს ცენტრის ინფორმირება და 2027 წლის აპრილში გადმოაგზავნოს მე-3 სტანდარტის 3.4.1.1 ინდიკატორის მტკიცებულებები, კერძოდ:

- ორივე შენობა-ნაგებობების სახანძრო უსაფრთხოების მოთხოვნებთან შესაბამისობის შესახებ დასკვნა;
- ორივე შენობის საგანგებო სიტუაციების მართვის გეგმა შეთანხმებული შესაბამის უწყებასთან;
- დასკვნა ორივე შენობის მდგრადობაზე.“

2. ზოგადსაგანმანათლებლო დაწესებულებების ავტორიზაციის საბჭოს 2025 წლის 22 აპრილის N431707 სხდომის ოქმის მეოთხე ნაწილი ცნობილ იქნას ამ გადაწყვეტილების განუყოფელ ნაწილად.

3. ზოგადსაგანმანათლებლო დაწესებულებების ავტორიზაციის საბჭოს გადაწყვეტილების გასაჩივრება შესაძლებელია კანონმდებლობით დადგენილი წესით და ვადაში, სააპელაციო საჩივრის სააპელაციო საბჭოში წარდგენის გზით (შემდეგ მისამართზე: ქ. თბილისი, მ. ალექსიძის ქ. მეორე შესახვევი №2) ან ქ. თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით (შემდეგ მისამართზე: დავით აღმაშენებლის ხეივანი, N64).

სსიპ-განათლების ხარისხის განვითარების ეროვნული
ცენტრი
ზოგადსაგანმანათლებლო დაწესებულებების
ავტორიზაციის საბჭო
საბჭოს მდივანი
ბერიკაშვილი ნინო

ნ. ბერიკაშვილი

სსიპ-განათლების ხარისხის განვითარების ეროვნული
ცენტრი
ზოგადსაგანმანათლებლო დაწესებულებების
ავტორიზაციის საბჭო
საბჭოს თავმჯდომარე
წიფურია ეკატერინე

ე. წიფურია

